

MAURICE ac OWEN (TEULUOEDD), Clennau, Penmorfa, Sir Gaernarfon, Glyn (Cywarch), Sir Feirionnydd, etc.

Ymdrinir â [S_r William Maurice](#) a'r [cyrnol Syr John Owen](#) ar wahân; yma cymerir brasolwg ar y teulu yn gyffredinol. Medd [Syr John Wynn](#), yn ei [The history of the Gwydir family](#), 'You are to understand, that in Evioneth there were two sects or kindred, the one lineally descended of [Owen Gwynedd](#), Prince of Wales, consisting then and now of four houses, viz. Keselgyfarch, y Llys ynghefn y fann, now called Ystymkegid, Clennenny, and Bryn kir, Glasfryn or Cwmstrallyn; the other sect descended of Collwyn [ap Tangno], wherof are five houses or more, viz Whelog, Berkin, Bron y foel, Gwnfryn, Talhenbont, and the house of [Hugh Gwyn ap John Wynne ap William](#), called Pennardd, all descended of their common ancestor, levan ap Einion ap Griffith.'

Priododd MORRIS (neu MAURICE), mab hynaf JOHN AP MEREDYDD, Eifionydd, Angharad, ferch Ellis ap Griffith ab Einion, a chael ohoni wyth o blant; yn eu plith yr oedd William Lloyd ap Maurice, cyndad [teulu Lloyd](#), Rhiwedog, gerllaw y Bala, Ellis ap Maurice (isod), Margaret, gwraig [Meredydd ab Ievan ap Robert](#), Gwydir, ac Ellen, a ddaeth yn wraig [John Wynn ap Meredydd](#), Gwydir, siryf sir Gaernarfon yn 1544-5. Gwraig gyntaf ELLIS AP MAURICE, neu ELISA MORRIS (bu farw 1571 yn 78 oed) oedd Catherine, ferch Piers Stanley, siryf Meirionnydd o 1485 hyd 1509; hyhi oedd mam MAURICE AP ELLIS (bu farw 18 Hydref 1575, yn 58 oed). Trwy ei ail wraig, Jonet, ferch Syr James Owen, Pentre Evan, Sir Benfro, cafodd Ellis ap Maurice (1) fab o'r enw James Maurice (yn fyw yn 1595), rheithor Llandwrog, Sir Gaernarfon, a Llanfwrog, sir Ddinbych, a changhellor Peterborough; (2) merch o'r enw Catherine, a briododd [Robert Wynn ap John](#), Glyn(cywarch), Sir Feirionnydd; a (3) Mary, gwraig [Morris ap Robert](#), Llangedwyn.

Mab hynaf Maurice ap Ellis a'i wraig (Ellen, ferch [Syr John Puleston](#)) oedd [Syr William Maurice](#) (1542 - 1622), a gymerodd yn wraig gyntaf, Margaret, ferch ac aeres John Wynn Lacon, Porkington (a elwir Brogyntyn yn awr), a Llanddyn, ac un o blant y briodas honno oedd y capten ELLIS MAURICE (1568 - ?), a fu'n ymladd dros y frenhines Elisabeth yn Iwerddon; aeres Ellis Maurice oedd Margaret, a briododd (1) John Jones, Wern, Penmorfa - gweler teulu [Wynne](#), Peniarth, a (2) Ellis Anwyl, Parkie, Sir Gaernarfon.

Dilynwyd [Sir William Maurice](#) yng Nghlenennau gan ei yres, ELLIN MAURICE (1578 - 1626), aeres Clennau, Porkington, a Llanddyn, merch William Wynn Maurice (a fu farw yn 1568, sef o flaen ei dad, [Sir William Maurice](#); gwraig W. W. Maurice oedd Mary, ferch John Lewis, Chwaen, sir Fôn). Bu Ellin yn briod ddwywaith - (1) â John Owen, ysgrifennydd Syr Francis Walsingham a mab Owen ap Robert, Bodsilin, Sir Gaernarfon, a (2), â Sir Francis Eure (bu farw 1621), prif farnwr cylchdaith gogledd Cymru. Trwy ei g r cyntaf, yr oedd yn fam i dri mab a phum merch. Y tri mab oedd y [cyrnol Syr John Owen](#) (bu farw 1666), y [cyrnol WILLIAM OWEN](#) (bu farw Hydref 1670, claddwyd yn Sylatyn, 11 Hydref 1670), Porkington, a fu'n amddiffyn castell Harlech dros y brenin Siarl I, a Maurice Owen, a gafodd diroedd yn sir Fôn gan ei fam. Aer y [cyrnol John Owen](#) oedd WILLIAM OWEN (claddwyd 30 Ionawr 1667/8), a briododd Catherine, unig blentyn [Lewis Anwyl](#), Park, Llanfrothen, a gadael [Syr ROBERT OWEN](#) (1658 - 1698), Clennau, Porkington, a Llanddyn, yn aer. Bu [Syr Robert Owen](#) yn aelod seneddol Meirionnydd o 1681 hyd 1685 ac yr oedd yn aelod dros sir Gaernarfon adeg ei farw. Ei wraig ef oedd MARGARET, merch hynaf ac aeres [Owen Wynne](#), Glyn (Cywarch), Sir Feirionnydd. Am fraslun o hanes aelodau diweddarach y teulu, sef disgynyddion [Syr Robert](#) a Lady Owen, gweler yr erthygl ar [Wynne ac Owen \(Teuluoedd\), Glyn \(Cywarch\) a Brogyntyn](#). Eglurir yn y gwaith gan [T. Jones Pierce](#) a enwir isod sut y tyfodd stad a theulu Clennau i bwysigrwydd mawr yn Sir Gaernarfon.

Awdur

Syr William Llewelyn Davies, (1887 - 1952)

Ffynonellau

W. W. E. Wynne, *Pedigree of the families of Maurice, Owen, etc., showing the descent of the estates in England and Wales of John Ralph, Lord Harlech* (London 1876)

T. Jones Pierce, *Clennau Letters and Papers in the Brogyntyn Collection* (Aberystwyth 1947), Part I

William Ll. Davies, '[Phylipiadau Ardudwy - A Survey and a Summary](#),' *Y Cymmrodor*, xlii, 1931 (cerddi a gyfansoddwyd i rai aelodau o'r teulu)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

